

罗伯逊圖書館 粵語虛擬導覽

Hello! 歡迎嚟到 Robertson Library 虛擬導覽。

你可以嚟圖書館搵一個靜嘅地方溫書、搵部電腦做嘢、睇吓書，或者搵人幫手。

當你入咗嚟圖書館，你會見到服務台。喺呢度你可以借書、借電腦、借叉電線同其他用品。你亦都可以嚟搵人教你印嘢同入錢落張學生證度。如果你有啲咩問題，隨時嚟搵我哋幫手啦！

如果你對你做緊嘅研究或者功課係搜集資料方面遇到困難嘅，你可以預約同你嗰科嘅圖書館理員安排一對一嘅網上或實體會面。你都可以 send email 俾你嗰科嘅圖書管理員搵佢哋幫手。

當你行嘅服務台左邊嘅門，就會到達多元學習空間。左手邊有 printer、scanner 同影印機。你可以喺度免費 scan 你需要嘅文件，或者用張學生證俾錢印嘢同影印。

繼續向前行，右手邊你會經過近期嘅期刊、參考書區，同政府文件。

左邊你會見到 Windows 電腦、iMacs、Mac Mini 電腦，同埋可以用來溫習嘅書枱。

你會留意到圖書館入面有唔同顏色嘅牌話俾你知你喺邊一個顏色嘅區域，而我哋分別用咗紅色、黃色同埋綠色分開對環境安定程度有唔同需要嘅人。例如有啲人想開會，咁佢哋就可能會比較熱鬧啲；有啲人想靜靜地溫書，咁佢哋就可能會想有一個靜啲嘅環境。喺進入唔同嘅區域之前請留意佢哋嘅顏色。多元學習空間就係屬於黃色區域，即係你可以進行聲量比較細嘅討論。至於圖書館其他部份，如果你係想聽音樂或者睇片嘅，你係應該佩戴耳機。

如果你轉右，你會見到 Writing Centre。而如果你遇到寫作上嘅問題，例如唔識 citation 或者想搵人幫你睇吓啲功課寫成點，你可以透過預約嚟同呢度嘅導師進行網上或者實體會面。

呢度就係我哋嘅「特別藏書區」，喺呢個區域入邊，你會見到館藏、大學檔案同埋微縮膠片。如果你想用相關嘅材料，你需要同 Simon Lloyd 預約時間，佢嘅聯絡方式可以喺圖書館網頁主頁度搵到。

當你行入多元學習區後面嘅門，你會見到通返去服務台嘅走廊。喺你嘅右手邊，有道門通去 LINC 同語言學習室。入咗道門之後，左邊係 LINC。度門係一般情況下都係鎖住嘅。而另一道門就係通向語言學習室，暫時係比西班牙文課堂所用，而語言學習室喺非課堂時段係開放比學生使用嘅。

返返嚟我哋入嚟嗰度，呢度有道門通向多媒體區。你會喺度見到有電腦、CD、DVD，同埋學習空間。而呢度嘅電腦主要係俾你配合房入邊嘅多媒體資源使用嘅。

返返嚟下面嘅大堂，呢度有兩個無性別洗手間、飲水機，而左手邊有部電梯。而上層嘅相同位置就有男廁同女廁。

當你由樓梯行上去，喺你嘅右手邊係閱讀室。入咗去閱讀室之後，右手邊係電腦室。當入邊無課堂嘅時候，你可以用入邊嘅電腦。

閱讀室係一個開放式嘅學習空間，你可以用入邊嘅枱同隔間溫書。呢度係一個黃色區域，即係你可以進行有限度聲浪嘅討論。當你離開閱讀室，你可以用樓梯返落地面，或者去藏書區。

入咗去藏書區有冇見到啲期刊。圖書館嘅收藏包括過往嘅資料同口述期刊。但係大部份嘅期刊、報紙、同雜誌都只可以透過電子形式閱覽，而你可以透過圖書館嘅資料庫查到相關資料。

呢邊嘅走廊有幾間學習室。呢啲學習室可以透過圖書館網頁預約，一節嘅使用時間分三個鐘，大部份嘅學習室都配備左電腦、LCD 屏幕，同埋一塊白板。

喺走廊嘅盡頭，你會見到間隔音房，你可以用來錄製影片、進行網上會議、或者你唔想背景有雜音嘅時候都可以用。如果你想呢間房，你係要透過網上預約。

喺書架嘅邊緣，你會見到黃色嘅隔間。呢一個區域係屬於紅色區，你必須保持肅靜。

當你經過呢個轉角位，你會見到走廊嘅盡頭有幾間細啲嘅學習室。之後喺另一個轉角位，你會見到我哋存放主要藏書嘅橙色書架，同埋 Sun Room 嘅入口。

Sun Room 係上層嘅另一個學習空間，同時係紅色區域。好多同學都好鍾意喺度溫書，尤其係冬天嘅時候。Sun Room 嘅另一邊係存放大型書籍嘅區域同埋隔間。

沿住呢條走廊行，你會見到可以網上預約嘅單人學習室，呢啲房同樣係紅色區域。雖然佢哋有門，但係天花板係相同嘅，噪音好容易會傳到去其他房。

依度出面嘅區域更多嘅電腦同隔間。

藏書區好容易令人蕩失路，容易離開嘅方法係搵到 PR 區，之後你就可以搵到出口離開。同樣地，跟住啲燈行亦都可以去到出口。

當離開咗藏書區之後，你會見到樓梯嘅另一邊有間閱讀室。你嘅右手邊係性別專用洗手間、飲水機，同升降機。而你嘅左手邊就係一個比你休息嘅區域。

行返落嚟，你會見到啲寬敞嘅座椅，同埋有關於 PEI 原住民歷史嘅展覽。

你依家就返到落嚟地下大堂啦！